

DOMENIE XXX «VIE PAL AN»

Antifone di jentrade Sal 104,3-4

Che il cûr si indalegri di ducj chei ch'a van cirint il Signôr.

Cirîl il Signôr e la sô potence;

cirîl di un continui la sô muse.

Colete

Diu onipotent e eterni,

fasinus cressi la fede, la sperance e la caritât,

e, par podê vê ce che tu imprometis,

fasinus volê ben a ce che tu nus comandis.

Pal nestri Signôr Gjesù Crist to Fi, ch'al è Diu

e cun te al vîf e al regne dutune cul Spirtu Sant,

par ducj i secui dai secui.

PRIME LETURE Es 22,20-26

Se ur fasarês malegraciis a la vedue e al vuarfin mi vignarà sù la fumate cuintri di vualtris.

Dal libri dal Esodo

Cussi al dîs il Signôr: «No sta fâi malegraciis al forest e no sta tibiâlu, parcè che ancje vualtris o vês stât forescj te tiere dal Egjit.

No stait a maltratâ une vedue o un vuarfin. Se tu i fasis malegraciis e lui al berle viers di me, jo o scoltarai il so berli; mi vignarà sù la fumate e us fasarai murî cu la spade: cussi lis vuestris feminis a restaran veduis e i vuestris fîs vuarfins.

Se tu i imprestis bêçs a di un de tô gjernazie, al pûar ch'al è a stâ cun te, no sta fâ cun lui compagn di chel ch'al impignore; no sta pratindi nissun interès. Se tu cjolis in pegn la manteline di un altri, tu âs di tornâje cuant che il soreli al va a mont. Al à dome chê par taponâsi, e je la manteline che si invuluce: cun ce aial di pognisi? S'al berle viers di me, jo lu scoltarai, parcè che jo o ai cûr».

Peraule di Diu.

SALM RESPONSORIÂL dal Salm 17

R. Ti vuei ben, Signôr, che tu sês la mê fuarce.

Signôr, mê crete, gno salvament e mê fuartece;

gno Diu, crete là ch'o voi a parâmi;

gno scût, potence che mi salve. **R.**

O ai clamât il Signôr

e le ai scapolade dai miei nemîs.

Vive il Signôr e benedete la mê crete,

ch'al sedi laudât chel Diu che mi à dât jutori. **R.**

SECONDE LETURE 1 Ts 1,5-10

Si sês convertîts, slontanantsi dai idui, par servî il Diu vîf e vêr e spietâ dai cîi so Fi.

De prime letare di san Pauli apuestul ai Tessalonicês

Fradis, o savês cemût che si sin compuartâts framieç di vualtris pal vuestri ben.

E vualtris o vês copiât di nô e dal Signôr, acetant la peraule framieç di tantis tribulazions ma cu la gjonde dal Spirtu Sant, che di fat o sês diventâts un spieli par ducj i fedêi de Macedonie e de Acaie.

Midian di vualtris, di fat, la peraule dal Signôr e à rimbombât no dome in Macedonie e in Acaie ma la innomine de vuestre fede in Diu si è slargjade pardut, di mût che nol covente che nô int fevelin.

Di fat e je la int stesse ch'e fevele dal acet che nus vês fat e di cemût che dai idui si sês convertîts a Diu par servî il Diu vîf e vêr e par spietâ dai cîi so Fi ch'al è resussitât dai muarts, Gjesù, che nus libere dal svindic ch'al sta par rivâ.

Peraule di Diu.

CJANT AL VANZELI cf. Mt 11,25

R. Aleluia, aleluia.

Benedet sêstu tu, Pari, Signôr dal cîl e de tiere,
parcè che ai piçui tu âs palesât i misteris dal ream dai cîi.

R. Aleluia.

VANZELI Mt 22,34-40

Tu amarâs il Signôr to Diu e il prossim come te in persone.

Dal vanzeli seont Matieu

In chê volte, i fariseos, savût che Gjesù al veve fat tasê i saduceos, si derin dongje ducj e un di lôr, espert di leç, lu interpelâ par metilu a lis provis: «Mestri, cuâl esal il comandament plui grant de leç?». I rispuindè: «Tu amarâs il Signôr to Diu cun dut il to cûr, cun dute la tô anime e cun dutis lis tôs fuarcis. Chest al è il plui grant e il prin dai comandaments. Ma il secont al è compagn di chel: Tu amarâs il to prossim come te in persone. Di chescj doi comandaments e dipent dute la Leç e i Profetis».

Peraule dal Signôr.

Su lis ufiertis

Cjale di bon voli, Signôr,
i regâi ch'o presentin a la tô maiestât,
par che l'ufierte dai tiei servidôrs
e ledi sù viers de tô glorie.
Par Crist nestri Signôr.

Antifone a la comunion cf. Sal 19,6

Si indalegrarin de tô vitorie
e o gjoldarin tal non dal nestri Diu.

O ben: cf. Ef 5,2

Crist nus à volût ben e si è ufiert par nô,
ufierte e sacrifici a Diu plen di bon odôr.

Daspò de comunion

I tiei sacraments, Signôr,
ch'a operin in nô ce ch'a significhin,
par ch'o podin gjoldi te plenece de veretât
ce che cumò o fasìn in maniere velade.
Par Crist nestri Signôr.